

perchè erano in questi garbugij, alcuna taia non li fo data.

Da Lodi, dil proveditor Moro. Di la praticia hanno col conte Filippo di Rossi, qual promete dar la rocha di Pavia e Parma.

Da Trevi, dil Marcello, provedador. Chome quel zorno, a di 8, passerano omnino con il signor conte di Pitiano e le zente a Rivolta Secha. *Item*, hanno missier Zuan Giacomo Triulzi domenega dovea ussir a la campagna.

Da Crema, dil podestà, do letere, di 8. La prima, di hore 16, avisa haver auto quella note letere di domino Nicolò da Mosto, li scrive. eri haver nova il signor Lodovico era reduto con el campo a Borgo Lenezaro, suso el novarese, tra Tressa e Novara, e missier Zuan Giacomo esser a Tressa con el campo. In Milano era fato la mostra di persone 4000 (*sic*); poi fono reduti a persone 24 milia, e per non haversi trovato danari da pagarli, erano restati, e Frachasso dovea venir con quelle zente a la volta di Geradada, e si diceva, il re di romani e il ducha di Baviera veniva con gran zente, e a Como erano zonti parecchij corsieri con breglie et fornimenti d'oro, e dice questi sono de li pasti dà el signor Lodovico al populazo. *Item*, eri in Lodi per le robe del conte Oliviero, qual domino Ambrosio Triulzi voleva tuor, era stato un pocho de bisbiglio, et per il mezo di monsignor di Montason e dil provedador nostro, fo adaptato il tutto. *Item*, eri la compagnia di Zuan Grecho, è stradioti cavali 30, sono stati a le man con quelli de Santo Anzolo, et hano preso un capo di balestrieri dil conte Filippo di Rossi, e uno altro balestriere di nimici era morto. *Item*, à di Lodi, domino Ambrosio Triulzi è mal visto per molte tyranie fa, e se non fusse la reverentia hanno a la Signoria nostra, lo ariano taiato a pezi, e haveano dimandato uno provedador nostro, acciò li governasse, et non questui che atende a tirar et guastar li fati dil re. *Item*, per l'altra letera, di 8, hore 3 di note, à letere di ozi, dà Piasenza, di domino Sonzin Benzon, come quella mane era zonto uno messo mandato a posta da domino Giacomo da Corezo a domino Zuan Giacomo Triulzi per saper quando el ditto domino Giacomo doveva operare. *Item*, partì luni da Borgo Lavararo, a presso a Vespola uno mio, e a presso Novara 6, et dice, domenega, missier Zuan Giacomo si levò di Mortara da matina. *Item*, altri messi venuti; e di uno dice di uno orator dil re, vien a la Signoria nostra, e nel campo dil Triulzi era più di 20 milia pedoni, lanze 1200, e gran numero di cavali lizieri, e li vol tor la via di le vituarie, e far fatti d'arme

col Moro, e desiderava passar Po, e netar la strada romea per unirse con el campo nostro. *Item*, esso podestà à mandato uno homo fino in campo di missier Zuan Giacomo, per saper; qual, ritornato, aviserà *etc.*

Da Brexa et Bergamo. Avisi di todeschi *etc.*, non da conto.

Da Monfalcom, di sier Bortolo di Prioli, podestà. Di la morte di sier Michiel Salamom, era castellan li. In loco suo à posto sier Simon Ferro *etc.*

Da mar, dil capetanio zeneral, di 24, da Corfù. Vene letere, qual non fo lete.

Et restò conseio di X suso. Et feno castelam, o ver provedador dil castel vechio di Corfù, in luogo di sier Marco Zen, refudoe, sier Alvise da Canal, *quondam* sier Luca, fo consier a Corfù, qual molto desiderava.

Electi tre auditori sopra le diferentie dil bancho di Garzoni.

Sier Vetur Marcello, fo a le raxon vechie, <i>quondam</i> sier Alexandro . . .	35.102
Sier Giacomo Michiel, fo auditor nuovo, <i>quondam</i> sier Thomà	66. 81
† Sier Francesco Marcello, è di pregadi, <i>quondam</i> sier Bortholamio	91. 66
Sier Zuan da Molim, fo podestà a Lendenara, <i>quondam</i> sier Cressi	26.125
Sier Nicolò Memo, fo auditor nuovo, <i>quondam</i> sier Andrea	46.107
Sier Zuan Trivixan, fo auditor vechio, <i>quondam</i> sier Zacharia, dotor, cavalier	50. 85
Sier Zuan Nadal Salamom, fo auditor nuovo, di sier Thomà	31.121
† Sier Zorzi Loredam, è di pregadi, <i>quondam</i> sier Francesco.	101. 48
Sier Piero Lando, fo capetanio di le galie di Alexandria, <i>quondam</i> sier Zuanne	82. 68
Sier Marco Michiel, el grando, <i>quondam</i> sier Fantim	33.118
Sier Francesco da Leze, fo provedador per le camere, <i>quondam</i> sier Lorenzo	69. 82
Sier Zuan Corner, fo camerlengo di comum, <i>quondam</i> sier Antonio	81. 66
Sier Bachalaro Zen, el cavalier, fo provedador di comum	25.125
Sier Daniel da Canal, fo a le raxon nuove, <i>quondam</i> sier Piero	39.108